

近代中國史料叢刊續編第八十八輯
沈雲龍主編

皇朝政典類纂
席裕福
沈師徐輯

田賦

文海出版社
有限公司
印行

皇朝政典類纂

田賦一

田制田額 民田

凡地之墾者曰田田亦曰地凡田地之別有民田有更名地有屯田有墾地有旗地有莊田有恩賞地有牧地有監地有公田有學田有賑田有蘆田皆丈而實其頃畝之數以書於冊會典

一奉天省各項田地共壹百捌拾柒萬柒千伍百叁拾捌畝有奇原額壹百柒拾捌萬貳千柒百壹拾伍畝

有奇退園地柒拾伍萬陸千陸百玖拾壹畝有奇原額捌拾叁萬壹千伍百畝有奇增賦餘地壹萬捌千貳

百壹拾伍畝各城旗地共柒百肆拾叁萬陸千陸百叁拾伍畝有奇各城餘地共壹百肆拾叁萬伍千玖拾

貳畝有奇

一盛京戶部所屬官莊壹百貳拾陸座內頭等糧莊壹拾貳座二等糧莊貳拾座三等糧莊叁拾柒座四等

糧莊肆拾玖座棉花莊伍座鹽莊叁座交鹽數目詳鹽法門

一吉林寧古塔伯都訥三姓等處各項田地共壹百肆拾叁萬玖千伍百伍拾陸畝有奇原額民地捌拾陸

萬肆千壹百肆拾捌畝有奇續行查出地貳拾玖萬柒千八百叁拾叁畝

一吉林將軍所屬官莊玖拾座吉林伍拾座甯古塔拾叁座伯都訥陸座叁姓壹拾伍座阿爾楚喀拉林陸

座

一黑龍江將軍所屬官莊壹百叁拾陸座齊齊哈爾叁拾座黑龍江肆拾座墨爾根叁拾伍座呼蘭伍拾陸

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 商家 本本书店
内容不排斥 转载、转发、转卖 行为
但请勿去除文件广告宣传页面

若发现去宣传页面转卖行为，后续广告将以上浮于页面形式添加

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



虛

一直隸省各項田地共陸拾捌萬捌千肆百壹拾頃陸拾肆畝有奇 原額陸拾捌萬柒千壹百貳拾肆頃玖拾玖畝有奇 入官旗地叁萬捌千柒百伍拾伍頃餘畝又屯莊地玖拾柒頃玖拾餘畝又畦地貳千柒百柒

拾壹箇

一山東省各項田地共玖拾捌萬肆千柒百貳拾捌頃肆拾陸畝有奇 原額玖拾陸萬肆千陸拾肆頃柒拾畝有奇

一山西省各項田地共伍拾叁萬貳千捌百伍拾肆頃壹畝有奇 原額肆拾玖萬捌千叁百伍拾伍頃柒拾陸畝有奇

一河南省各項田地共柒拾壹萬捌千貳百捌頃陸拾肆畝有奇 原額壹百陸萬柒千捌拾肆頃壹拾貳畝有奇

一江蘇省江寧等屬各項田地共肆拾萬貳千叁拾貳頃貳拾陸畝 原額肆拾貳萬伍千壹百陸拾叁頃捌拾貳畝有奇 蘇州等屬各項田地共貳拾肆萬伍千伍百壹拾伍頃壹畝有奇 原額貳拾肆萬陸千貳百叁拾柒頃叁拾貳畝有奇

一安徽省各項田地共叁拾肆萬柒百捌拾陸頃叁拾叁畝有奇 原額叁拾捌萬貳千陸百陸拾伍頃捌拾畝有奇 草山叁千貳拾里

一江西省各項田地共肆拾陸萬貳千壹百捌拾柒頃貳拾柒畝有奇 原額肆拾陸萬玖千肆拾陸頃伍拾

雜畝有奇

一福建省各項田地共拾貳萬捌千陸百貳拾陸頃陸拾肆畝有奇原額壹拾叁萬捌千伍百叁拾陸頃柒

畝有奇臺灣府屬田園共肆萬捌千拾叁甲有奇原額肆萬肆千肆百陸甲有奇每拾壹畝叁分壹釐為壹

甲又田園貳千貳拾玖頃捌拾捌畝有奇

一浙江省各項田地共肆拾陸萬肆千壹百貳拾頃貳拾陸畝有奇原額肆拾陸萬叁千捌百捌拾肆頃捌

拾陸畝

一湖北省各項田地共伍拾玖萬肆千肆百叁拾玖頃肆拾肆畝有奇原額伍拾陸萬玖千壹百壹頃肆拾

貳畝

一湖南省各項田地共叁拾壹萬叁千肆拾貳頃柒拾叁畝有奇原額叁拾壹萬叁千肆拾貳頃玖畝有奇

一陝西省各項田地共貳拾伍萬捌千肆百貳頃壹拾貳畝有奇原額肆拾柒萬玖千伍百壹頃陸畝有奇

一甘肅省各項田地共貳拾叁萬伍千叁百陸拾陸頃貳拾壹畝原額貳拾叁萬伍千陸百捌拾肆頃壹拾

叁畝有奇

一四川省各項田地共肆拾陸萬叁千捌百壹拾玖頃叁拾玖畝原額陸拾陸萬貳百伍拾捌頃叁拾陸畝

有奇

一廣東省各項田地共叁拾肆萬叁千玖百叁頃玖畝有奇原額叁拾肆萬貳百壹拾陸頃叁拾伍畝有奇

一廣西省各項田地共捌萬玖千陸百壹頃柒拾玖畝有奇原額玖萬玖千玖百貳拾肆頃壹拾玖畝有奇

又田陸千陸百肆拾壹疇有奇原額陸千伍百肆肆每田伍分爲壹伍壹畝爲壹什貳畝爲壹白貳白爲壹

虛騰田叁百叁拾玖戶係太平府屬官族目男目卯首出畸零田地難以查丈均論戶輸糧

一雲南省各項田地共玖萬叁千壹百柒拾柒頃玖畝有奇原額玖萬叁千壹百肆拾伍頃陸拾柒畝有奇

官莊田地捌百貳拾貳頃貳拾餘畝又夷田捌百捌拾叁段

一貴州省各項田地共貳萬陸千捌百伍拾肆頃有奇原額貳萬陸千捌百貳拾伍頃陸拾畝有奇以上

戶部則例

右田額

國家民田之目直隸有更名田農桑地蒿草籽粒地蕘課地歸併地河淤地盛京有退園地山東有歸併

衛所地更名田竈地江西江蘇有山蕩漫灘地安徽有草地江西有山塘等地浙江有山蕩塘湖桑茶竈地等

地陝西有更名地廣西有泥溝車池地廣西有獵田獐田貴州有苗田甘肅有熟田蠶地皆爲民田通典

一貴州苗疆屯戶人等越界侵佔苗人田土山場并砍伐竹木該衛千總失於覺察及徇情隱匿不報者分

別議處

一成熟田畝或因水冲沙壓變爲瘠薄者准其隨時查明取結造冊題報日後或培植復熟亦即隨時確勘

取具冊結題報則例

順治元年世祖章皇帝御宇因明季變革版籍多亡田賦無準首著御史衛周祚巡行畿甸見正定府荒地十

居六七請行清查編審之法通志

張爾岐方田法曰方田法始於宋神宗景祐時其後屢行廢能至徽宗大觀五年復行方田官更妄增田稅至并不食之山而方之御史臺受訴有二百餘畝方爲二十畝者有二頃九十六畝方爲七十畝者處州之瑞金是也有稅租一十三錢增至二貫二百者有稅租二十七錢增至一貫四百五十者處州之會昌是也民大擾懼乃遂罷之其時又以中官楊戩主後苑作始立公田以樂尺打量民田取其贏者入官別立租課有宋仁厚之澤盡矣方田法用竹纜方量每面千步立封訖乃令民於方內認所種田竹纜不能引之使長稍屈稍邪便虧原數豪強者各自取盈則貧弱者不得自有其地矣且有一段分割三四方內者奇零表曲打算爲難一畝猶胥之分派此瑞金之所以有地而無地會昌之所以無稅而有稅也順治己亥東省行方田法親見其弊故知之頗悉孟子言方里而井井九百畝周以百步爲畝每里三百六十步方之當得一千二百九十六畝而外尙餘三百九十六畝以爲溝塗遂路之地則地之不稅者多矣此商鞅之所以銳意剷除也 嵩齋集

李復興均田議

一均圖之法一縣區圖田額多寡不齊若一體承役必致大小不均茲蒙科憲柯題定均圖之法先將該縣田地通盤打算均分若干圖每圖應均準熟田若干畝一圖分立十甲每甲應準熟田若干畝無論紳衿役民一并照田編甲則田必入圖圖無虧田永杜偏枯之弊矣

一并田之法人之有田者不必其盡在一圖也不盡在一圖而乃逐圖承役田多則催辦他人之田田少則又派辦於他人名下分頭四應日無休息矣爲思窮變通久之方誠莫便於并田之法凡有田者

不拘原舊區圖界限如一人有數百畝之田而生落不等區圖者卽以數百畝不等區圖之田彙歸本戶遵照均定新圖田額分爲各口編列一處完糧其小戶田不足甲仍許因親及親因友及友共并一甲卽於甲內分註明白各自出口聽其自己造冊呈遞冊內開明收并原某某都某某圖某某圩號田若干俟遞到之日查其住址相近者挨順編配是爲以田就人非以人就田人人自收自田己完己稅不用催辦之勞可杜愈點之弊徵輸俱便較之原圖挨順割配之法更爲盡善也

一銷圖之法通縣田地每圖俱有圩號務先著令各圖造明挨號一冊開注現業戶名呈遞存案以爲均田張本俾從前飛灑隱漏之弊盡行釐剔革除然後令業戶查明號冊照數收并卽將業戶造成田冊逐號參對原圖核準無異隨於該圖原號內注銷俟編圖之日注明新編某圖訖倘有田數無多不願自己出名寄并親識名下務要開明原戶姓名以便銷圖仍再取戶領號一冊以與號冊爲經緯比如某圖一人共有田若干內某某圩某某號各若干就田之多少挨次攢造其存圖零星田畝無非收并者亦卽按田按戶編歸一甲各照徵輸則無不稅之田矣斗山文集

康熙八年戶部請准道員赴直隸將前明廢藩田產分荒熟酌量變價 上以地既易價復征額賦重爲民累諭令撤回將未變價地畝給與原種之人改爲民戶號爲更名地承爲世業通典

三十一年遣官往淮揚等處踏勘民田河道總督靳輔言淮揚徐鳳所屬州縣其黃水涸出及河旁淤成膏腴地豪民占種請 敕江南督撫就近清查得 旨此事若遣地方官踏勘恐借端擾民著遣部院堂官前往會

同該督撫確查定議通考

乾隆元年諭曰朕聞濱海之鄉坍塌不常田無定址於是豪強得恣侵占而爭端日興其責在地方有司熟悉土宜按制定法弭釁於未然而平其爭於初發則可爲良吏矣夫州縣有司非盡不知愛民者特以田土情形未能稔悉不得不寄耳目於吏胥而猾吏奸胥又往往與土豪交通變亂成法予奪任意弱肉強食爲厲無窮獄訟繁興端由於此至若沿海所漲之沙鄰邑互爭有司又各袒所屬益滋紛擾此皆徇私而未識大體者朕以天下爲一家而州縣官各膺子民之責亦當體朕之心以爲心又焉忍伸此屈彼長其姦而導之攘奪哉前此海濱要地增設大員彈壓果其秉公察看經理得宜應卽令界址劃然各歸其產不得遷延歲月仍假姦民之便而使窮黎失業也夫豪強不懲則無以安良善經界不正則無以杜爭端該督撫應飭所屬親民之員毋以姑息怠緩從事庶令民業各正而爭訟自少息矣通考

一凡沙洲坍塌業戶報官責成道府督同州縣勘查原地若干寶坍若干願請豁糧者准其豁除不願請豁者繪圖註冊通詳立案遇有新漲查明邱號糧冊果係子母相連方准撥補撥補所餘及另漲餘沙儘數入官召變若現報子母相連或冒稱原坍復漲以及私行霸占者淤洲入官仍照盜耕官田律治罪地方官查丈不確撥補不公查參議處

一新漲沙地四面臨江附近無應補坍戶謂之江心突漲應歸公召變令州縣官丈明頃畝若地處兩邑會同查勘秉公定價通詳召變該司以具呈繳價在先者准其認真

一河南省沿河堤外灘地編列區號以伍頃肆拾畝爲一區植樹爲界每區各擇一人專司查丈造冊遇有塌長隨卽陸除

一浙江海鹽州屬南沙地畝改隸蕭山縣管轄如有漲阜新沙查係原坍漲復仍歸海鹽州原業認陞若係天漲新沙准歸蕭山縣民認陞均不得妄行爭執

一江南省湖臨江海沙地報坍後如有新淤無論與坍剩之地毗連與否但在舊坍界內謂之故土復生准其查明報坍撥補其江心突漲四面臨江及小港之內新漲沙地不在坍戶界內者應歸公召變令民竈各戶自行具結承買毋許一人承領包攬

一陝西省朝邑華陰二縣山西省永濟一縣濱臨黃河灘地以陸分給山西肆分給陝西分界耕種每畝徵穀壹斗歸各本省地丁案內另款報銷如河流遷徙坍漲照分定界限隨時報勘陞除以上戶部則例

二年御史薛溫條奏各款內有限田一條交總理事務王大臣閱看王大臣等議限田之說種種擾亂為害甚大斷不可行東華錄

八年諭前漕運總督顧琮奏請舉行限田之法每戶以三十頃為限以為如此則貧富可均貧民有益朕深知此事名雖正而難行因諭云爾以三十頃為限則未至三十頃者原可置買即已至三十頃者分之兄弟子孫每人名下不過數頃未嘗不可置買何損于富民何益于貧民況一立限田之法若不查問仍屬有名無實必須戶戶查對人人審問其為滋擾不可勝言夫果滋擾于一時而可收功于日後亦豈可畏難中止今輾轉思維即使限田之法地方官勉強奉行究于貧民無補是不但無益而且有累也而顧琮猶以為可行請率領地方官先于淮安一府試行之朕令其再與尹繼善熟商今據尹繼善陳奏難行之處與朕語不約而同則此事之斷不可行斷不能行實出人人之所同然又豈可以嘗試特降旨曉諭顧琮此事著停止并令各督撫知之

黃中堅限田論曰聖王之治天下也所以使之各得其所而無所偏陂不平之患者非能設爲一切之法以整齊之也亦因乎時勢之所宜而善用其補救而已矣苟鯁鯁焉存抑彼伸此之見而欲以古人之成法治今日之民則其勢必有所不行昔者井田廢而阡陌開固亦窮變通久之勢所必至也而兼井之風遂日以盛於是董仲舒師丹諸儒建限田之議而卒不果行至元魏口分世業之法則其法較密而亦行之有效說者以爲得井田遺意而惜其後無踵而行之者嗚呼孰是說也幾何而不爲安石之周禮耶吾觀三代盛時以九職任萬民自邱陵園廬漆林而外大率盡歸於井田每夫受田百畝餘夫又別受田二十五畝宜其民之皆有以自養然其時卽有若閭民之轉移執事待人而食者況積漸以至今日而安得不富者連阡陌貧者無立錫也哉凡事處積重難返之勢而一旦欲力矯其弊未有不至於擾民者彼口分世業之法吾謂獨元魏之世可行之耳蓋北方本土廣人稀而魏又承十六國從橫之後人民死亡略盡其新附之衆土田皆非其所固有而戶口復可得而數是以其法可行要之田無盈縮而人有衆寡則更一再傳而其法當亦不能無弊也若夫大江以南則更有不可行者非特奪富民之田以予貧民而以爲不可也夫憫民之貧無立錫也而欲奪富民之田以予之則必人有以予之而後可也而今之大縣戶不下數萬苟欲計口而授田則田少而不足以給其不可一也今之承事於官者率富民也徵發之令不及於小民彼小民竭終歲之力不過能耕十畝蓋有見徒隸則心惕息者矣設與以數畝之田而責以賦役之事彼將爲賦役所困而并不得安其耕其不可二也量地斟酌損益雖得良有司竭力奉行而

亦非期月所可辦其間奪者已奪受者未受國家之財賦力役將責之何人其不可三也至於既行之後又當鈎者其受田還田吏胥上下其手弊孔必且百出其不可四也且緩急人所時有今既官爲之限則變賣之際必多窒閼而難通其弊也勢必富者有多田之實而無其名貧者有受田之名而無其實而民之困乃愈甚其不可五也故欲以多限之如綏和之名田無過三十頃則雖稍可裁抑豪右而實無補於小民也欲以少限之如太和之人受露田四十畝桑田二十畝則富者必見怨而貧者不必見德不適足以擾民哉故夫以限田爲良法而欲行之者皆不審於時勢之說也吾謂後之君子留心田制亦務時其消長正其版籍禁其侵欺而且輕徭薄賦以與民休息使富民皆得推恩於貧民而貧民亦寧知自好而恥犯法則物各得其所而天下治矣何必附會井田始爲仁政哉

書齋集

二十年江西巡撫胡寶瑗奏蘆洲撥補略曰乾隆十三年部定坍洲報官立案遇有漲淤撥先後撥補餘乃召墾升科唯有課無課洲各不同凡洲地先見水影次沙灘次泥灘次草場草坦漸至成洲納課爲時甚久工本亦多非水影沙灘本無課而冒稱洲田者可比經部定新漲地畝先儘有課坍戶補足再撥補無課之坍以示均平案田畝之訟唯洲田爲最紛往往洲已復沉而訟尙未結結民預爭水影爲張本親民之官所宜早釐冊籍詳察地形若貿然履勘徒以車馬僕從煩民則訟端益滋多矣

石渠餘記

五十年廣東巡撫孫士毅奏竊惟粵東地方每歲所產米穀不敷民食全賴粵西穀船爲接濟其故緣粵東山多田少地接海洋其爲山佔者十之三其爲水佔者又不啻十之四可耕之地本屬無幾而民居煩庶商賈充盈就廣州一府而論需米之多又數倍于他郡偶遇粵西穀船稀到糧價卽不免驟昂臣到任年餘情形

略悉向來濱海居民見有漲出沙地名曰沙坦開墾成田栽種禾稻實爲天地自然之美利海民藉以養生者甚衆乾隆元年及乾隆七年前督臣湯永斌王安國等先後條議請給農民開墾升科經部臣核覆具奏均荷 聖恩允准自此凡有沿海沙坦俱經陸續報墾升科民情稱便至乾隆三十七年尙書裘曰修驗收直隸永定河工程聲明近水居民與水爭地之弊欽奉 諭旨通飭各省督撫凡有瀕水地面除已墾者免禁外嗣後毋許復行佔耕維時經前督臣李侍堯撫臣德保飭司詳將瀕海坦畝禁墾不准報承以現無與水爭地情形 奏覆此粵東沙坦前開後禁之原委也查自禁墾以後民間視爲官荒轉生覬覦其間良懦者畏事退縮豪強者任意兼并始則偷種繼則搶割逞兇滋事皆由此起徒有當官禁墾之名實起百姓爭攘之路並有商民串通濱海爐丁巧借開築鹽場爲名呈官給照居然栽種禾稻並未熬鹽及被告發又變爲養隨名色飾詞搪抵農民見其有禁有不禁因此搶案愈多旋結旋翻糾纏不斷官則束手無策下復因緣爲奸甚至明禁暗墾民不納賦而吏則取租情僞請張皆屬事所或有臣于上年春間奉 命調任粵東清查積案體訪輿情知沙坦原屬無碍水道則訟案儘可逐一清釐隨檢查從前李侍堯等禁民墾築原奏係專指內河出水要區恐高築隄埝有碍水勢者而言並非爲大海之濱漲生沙坦有碍水道也惟奏案內未曾分晰周詳地方官一時誤會遂將沿海沙坦一概禁止幾同因噎廢食臣于上年同前督臣舒常分路查勘各屬圍基乘便察視地方情形見粵東傍海池坦與他省濱水地面迥不相同河湖水勢利其疏暢順流若任民佔耕則地勢日狹自與水道有碍若大海之濱洋面寬廣一望無涯並不以坦之有無形其地之寬窄是此等水面距民居不遠宜漲而不宜場海洋多漲一分卽民居多增一分衛護實無與水爭地之

愚臣伏查粵東沿海州縣皆有沙坦其近省之南海番禺東莞順德香山新會六縣為最多利之所在爭趨若鶩與其禁之而陽奉陰違徒滋訟累似不如開之而給求養欲俯順民情 國家休養生息百數十年積表生齒日煩省會五方雜處食指尤眾我 皇上念切民依凡山頭地角苟利耕耘無不准令樹藝惠此群黎乃粵東以千百頃無碍水道之沙坦一旦置為廢壤實為可惜又復毫無限制似禁非禁不官不私以致窮民不甘紛紛許訟殊非覈實辦公之道臣愚以為若將此種沿海無碍沙坦照舊給民承墾升科即以千頃而計每歲約可添穀十萬餘擔即毋庸全仗粵西穀船之接濟裨益民食正復不少再濱海荒地若嚴禁開墾則村墟寥落人迹罕到盜匪易於出沒沙坦一開則凡荒陬僻遠之區悉成沃壤膏腴之地無業窮民俱得搭蓋寮舍盡力南畝既可潛消其為匪之心而洋面盜船遙見耦耕鋤耨農民皆有守望自不敢停泊往來肆行無忌于地方更可寧謐矣 皇清奏議

宮獻琛曰南北異方高下異勢燥濕異性故旱田之不可為水猶水田之不可為旱也今必欲以荆揚之物產漏植之雍冀是第知言水利而不知因地之利以為利也且果行遂人溝洫之法則西北旱田亦利其何減于東南何則西北諸州其地之廣輪既數倍於東南且穀之種類繁多有宜五種者有宜四種者有宜三種者周原膺膺土脈厚而水源深其肥沃比東南之塗泥又奚翅倍焉所患者惟水與旱耳溝洫修而水早有備則西北諸州歲之所入非徒不減于東南且什伯而無算矣或疑井田既廢欲復遂人之法勢有所不行是又不然夫善復古者亦師其意而已矣觀周禮遂人之法原與稻人之法不同稻田不可一日無水故以瀦畜之以防止之以遂均之矣必以列舍之而後以澮寫之焉旱田則澮之為患者十

之六七旱之爲患者十之二三故遂人五溝之大小不同其實皆溝也揆先王爲溝洫之本意第欲使水多之年水行溝中而不泛水少之年又可蓄溝中之水以滋田耳今但相其地之下者以爲行水之區又相其地之最下者以爲蓄水之所疏其節閘其目不用盡復古溝洫之制而已獲溝洫之利矣石塘文集嘉慶二十五年上諭農田爲足食之本而溝洫之利尤大使灌溉有資宣洩有備卽間值水旱可資救禦若能於北省多闢水田兼收南方秔稻之利實與民生有裨所有直隸境內著方受疇飭委委員相度各河淀水勢倣照雍正年間成規設法經理並多方勸導能使水田歲有增墾收穫漸多則小民必樂於從事其山東山西河南並著該督撫各就境內一體籌畫其可以經理水田之處各勸諭農民次第興舉需之歲月以觀其成不可視爲具文用副朕惠民重食至意 聖訓

桂林朱蘊叔龍翹爲蒲令邑處萬山中高峻陡坂非雨澤不能有秋乃刊區田圖說勸民爲之區田者始於伊尹古法不可考已元王楫農推本汜勝之之法以爲每田一畝廣十五步每步五尺計七十五尺每行占地一尺五寸計分五十行其長十六步每步五尺計八十尺每行占地一尺五寸計分五十三行長廣相乘得二千六百五十區空一行種一行隔一區種一區留空以便澆灌且可疏風不致熱壞而以餘土壅根也除隔室外可種六百六十二區區深一尺用熟糞二升驟用生糞恐峻熱害苗也與區土相和布種勻覆以手按實令土與種相著苗出時每一寸留一株每行十株每區十行留百株別製廣一寸長柄小鋤鋤多則糠蕩若鋤至八遍每畝一斗得米八升如雨澤時降則可坐享其成旱則澆灌不過五六次卽可收成結實時鋤四旁土深壅其根不致被風吹折其爲區當於閒時旋旋掘下春種大麥宛豆夏

種粟米黑豆高粱黍秋種小麥隨天時早晚地氣寒暖物土之宜節次爲之不必貪多毋論平地山莊
歲可常熟近家瀕水爲土其種不必牛犁惟用鑿鏝更便貧家大率區田一畝足食五口丁男兼作
婦人童子量力分工定爲課業若糞治得法灌溉以時雖遇災旱不能損耗後衢州詹文煥監督大通於
官舍隙地爲之計一畝之收五倍常田又聊城鄧鍾音於雍正末亦嘗行之一畝之收多常田二十斛勸

農治生者當考鏡焉

熙朝新語

陳斌溝洫論曰三代溝洫之利其小者民自爲也其大者官所爲也溝洫所作之土卽以爲道路所通之
水卽以備旱澇故溝洫者萬世之利也後世慮其棄地之多而實無多也一井之步約百有八十丈其爲
溝畛者八尺而已一成之步約萬有八千丈其爲洫與涂者九積十有四丈四尺而已通計所棄之地二
百分之一而弱也今更新爲之必有慮其事之難成者則更非甚難之事也斌觀剛田之法一尺之剛二
尺之遂卽耕而卽成者也今蘇湖之田九月種麥必爲田輪兩輪中間深廣二尺其平闊之鄉萬輪鱗接
整齊均一彌月悉成古之遂逕豈有異乎設計其五年而爲溝洫則合八家之力而先治一橫溝田首之
步之爲百八十丈者家出三人就地築土二日而畢矣明年以八十家之力治洫廣深三溝其長十之料
工計日三日而半七日而畢矣又明年以八百家之力爲洫廣深三洫其長百溝料工計日一旬而半三
旬而畢矣卽以三旬之功分責三歲其就必矣及功之俱成民剛田以爲利一歲之中家修其溝衆治其
溝洫官督民而浚其洫有小水旱可以無飢十分之飢可救其五故曰萬世之利也百姓一夫失業則飢
十日失業則殍此寬其家自爲生人自爲力矣乃終歲墾田而仍飢以勞者一則以歲之不時一則以溝

池之不治也或之不時人所莫能爲也溝池之不治農民莫能爲官可齊其力而爲之也其不爲者蓋時無大水旱則坐視爲不必爲及水旱至而拯卹不遑又萬萬無可爲者加以民食之盈絀必數年而後見國家之利病必數年而後見事無近功官無嚴課故吾民之死生飢飽一聽命于不可知之歲而曾無十之一之防百一之救也斌謂救荒無善策爲溝池于未荒之時此豫救之策也卽爲溝池于救荒之時卽飢民卽功而就食此一救而兩救之策也然而土異形人異習按方尺之圖動十萬之衆如漢武帝之輕用方士坐廣廈之內度溪谷之外如王安石之欲田梁山泊者則固不可爲也卽春議經界秋議遣使如宋天禧之提點刑獄並領勸農之職而仍無纖毫之益于民者亦名美而不足恃也故爲溝池必訪求于鄉善里長而總其事于郡守責其成于縣令分其任于縣丞主簿則親而不擾久而必成今集四境之善長體訪以人情地勢有灼見其可興溝池者準里計日具圖以作其功有廢地可以溝通者則募其附近失田之夫爲之官助其不足田成而授其人五年而起科畝十而當一有溝池其業田爲永利者則以任本業之人民實其田官均其力春夏作五日秋作十日冬作二旬丞簿親董之令一作一視先成者籍而成于官其未成者簿志之至來歲續而畢爲民田一頃聽溝地半畝令不當溝塗之道者轉償其鄰田田不及頃則任力而不聽田二十畝以下者責其力蓄洩之利兩邑共之則郡守責其兩令令或代去則交其簿于受代之人凡縣令置農田課郡守察之其阻成功及借名生擾者黜蘇湖之民善爲水田春收豆麥秋收禾稻中年之人槩得三石而北方之種地者不能半之則以無爲水田者也凡穀之種禾稻倍入種稻之田水田又倍西北土性高燥宜麥宜梁所在低平之田卽爲下產以其非梁麥之性而雨澤一過水

無所注故也誠能勤行相度分年規地仿溝洫之意備蓄洩以爲水田種禾稻以佐晚熟則高地之水四注而爲害者必轉以爲利矣且爲溝洫非古之鑿空求利者比也以民田興民利不遺使不起徒不招流戶視其大小功力隨作隨成有小水旱此豐而彼歉則鄰近必有請其法而自爲之者勿憂其事之難于虞始也自雲文鈔

道光六年上諭軍機大臣等程祖洛奏查勘武陟縣放淤地畝疏消積水情形一摺武陟攔黃一堰年年修守糜帑病民自不若籌辦放淤俟一二年內灘淤高即可永除水患前因有人條奏無裨宣防又淹田畝耕種無望復降旨令程祖洛督同河北道詳加履勘并飭令趕緊疏消茲據奏稱放淤時進水甫及旬餘受淤之地自三四尺至三四寸者已有三百七十餘頃不爲無益嗣因河溜南趨將進黃溝堵閉開順清溝敢放宣洩九月以後陸續涸出地畝已逾十分之九前存積水一片未涸地畝共止八十餘頃不及十分之一水深止一二寸至五六寸不等十月以前涸復七八分之地均經播種二麥十一月以後新涸地畝一分有餘須待來春播種其未涸之水現在逐日見消計二十日內即可涸盡惟將來面水消去底水益形低窪外灘愈形高仰消放倍難巨冰凌凝結須逐段敲打方能施用戽斗著准其寬限至明年正月二十日以前一律疏消全涸該撫卽督飭該道責成廳縣晝夜認真趕辦依限完竣如有遲延將該廳縣嚴參懲處總期無誤東作俾得補種春麥仍恐地畝甫經涸復而積潦已久不能乘時播種並著該撫屆期體察情形如有應行調劑之處據實奏辦毋許稍有諱飾至明歲應否續行放淤仍著屆時察看溜勢情形奏明分別辦理

聖訓

九年八月辛巳定江蘇沿江海新漲沙洲召佃章程東華續錄

十四年申禁雲南流民租種苗田 華東續錄

又諭軍機大臣等有人奏貴州興義等府一帶苗疆俱有流民濶跡此種流民關係湖廣土著因近歲水患覓食維艱始不過數十人散入苗疆租種山田自成熟後獲利頗豐遂結蓋草房搬運妻孥前往上年秋冬由湖南至貴州一路扶老攜幼肩挑背負者不絕於道均往興義等處應行查禁等語安邊莫要於除奸撫夷貴安其生業上年四川峨邊等處夷匪滋事係因流民占種夷田肇釁地方官果能及早查禁何至釀成事端若如所奏貴州苗疆一帶外來流民租種山田絡繹不絕愚民惟利是圖趨之若鶩將來日聚日眾難保無狡黠之徒始以租種爲名繼且據爲己有苗民受其盤剝目前卽倖相安日久必滋爭奪甚或占據開墾煽惑苗民種種弊端均所不免不可不嚴行飭禁著阮元訥爾經額裕泰尹濟源吳榮光各飭所屬確切查明現在貴州地方外來遊民有無租種苗田之事是否均係湖廣土著民人一經查出卽行設法緝爲遣歸原籍交地方官管束毋許一名逗留致滋弊竇並著該督等卽妥議章程據實具奏 聖訓

十九年諭軍機大臣等據琦善奏籌議水田情形覽奏已悉北直水田之利自雍正年間辦理以後迄今百有餘年規制率多更變著琦善於來春校閱營伍之便察看經過地方實在情形分別駁辦並著布政使陸費瑤俟明歲春融親歷各該處周稽博採如有可作水田之地確切查明具奏候旨辦理此事原期經久盡善不在同時全行興辦要使得一頃卽有一頃之益得一畝卽有一畝之益行之以漸持之以恆於國計民生實有裨益 東華續錄

二十三年諭內閣訥爾經額奏遵查直隸地方難以興舉屯政水田一摺據稱天津至山海關一帶戶口殷繁

地無遺利其無人開墾之處乃沿海灘灘潮水鹹澇不足以資灌溉屯田之法勢難舉行至全省水利之說屢經試墾水田屢興屢廢總由南北水土異宜民多未便而開源疏洩建開修塘一切工費皆需重帑未敢以有用之項輕議試行惟地高慮旱地窪慮澇但在地方官於境內溝洫及時疏通以期有備或開墾井泉以車戽水亦足裨益田功等語所奏自係實在情形均著照議辦理至南省民間用水車汲井澆田需費不多最為利便現據該督照式製造發交各府州著卽詳飭各屬廣爲勸導實力奉行如有民間不知此法卽於頒發式樣後勸令按井製車試行灌溉其始未免惜費憚勞如行之有效互相傳造於農功必有裨益用副朕敦本重農之至意 聖訓

林則徐擬開近畿水田疏 國家建都在北轉粟自南京倉一石之儲常糜數石之費奉行既久轉輸固自不窮而經 國遠餉務爲萬年至計竊願更有進也恭查雍正三年 命怡賢親王總理畿輔水利營田不數年墾成六千餘頃厥後功雖未竟而當時效有明徵至今論者慨想遺蹤稱道弗絕蓋近畿水田之利自宋臣何承矩元臣托克托郭守敬虞集明臣徐貞明邱濬袁黃汪應蛟左光斗董應舉董應歷議行皆有成績 國朝諸臣章疏文牒指陳直隸墾田利益者如李光地陸隴其朱軾徐越湯世昌胡寶琛柴潮生藍鼎元皆詳乎其言之以臣所見南方地畝狹於北方而一畝之田中熟之歲收穀約有五石則爲米二石五斗矣蘇松等屬正耗漕糧年約一百五十萬石果使原墾之六千餘頃修而不廢其數卽足以當之又嘗統計南漕四百萬石之米如有二萬頃田卽數所出倘恐歲功不齊再得一倍之田亦必無虞短絀而直隸天津河間永平遵化四府州可作水田之地聞頗有餘或屏窪下而淪爲沮洳或納海

河而延爲葦蕩若行溝洫之法似皆可作上腴臣考宋臣鄭僑之議謂治水先治田自是確論直隸地方若俟衆水全治而後營田則無成田之日前於道光三年舉而復輟職是之故如仿雍正年間成法先於官蕩試行興工之初自須酌給工本若墾有功效則花息年增一年譬如成田千頃卽得米二十餘萬石或先酌改南漕十萬石折徵銀兩解京而疲幫九運之船便可停造十隻此後年收北米若干概令核其一半之數折征南漕以爲歸還原墾工本及續墾佃力之用行之十年而蘇松常鎮太杭嘉湖八府州之漕皆得取給於畿輔如能多多益善則南漕折徵歲可數百萬而糧船既不須報運凡漕務中例給銀米所省當亦稱是且河工經費因此更可大爲撙節上以裕國下以便民皆成效之可卜者我朝萬年至計似在於此可否 飭下廷臣及直隸總督籌辦之處伏候 聖裁見顯志堂集

馮桂芬曰文忠疏藁始將以述職上之 宣廟嘗國某尼之 召對亦未及事遂不果行顯志堂集

包世臣致江西巡撫陳玉生書云江右產穀全仗圩田從前民奪湖以爲田近則湖奪民以爲魚圩田大都在會垣四面二百里內失收六年流亡過半而隄身情形皆壁立不能禦漲民力既殫公項亦匱若遂聽之則餘黎嗟靡遺矣檢閱志乘每縣圩名累百其實圩隄不多皆以一大圩包數十小圩而小圩在腹內之業戶於大圩修廢從不聞問大圩當江湖之衝有如城垣小圩包於大圩隨地立名間有子隄爲界不過如城內民居之院牆大圩一隄關數十圩之利害而承隄止本圩業戶是焉得不壁立乎有司注意哨在錢漕從未有周歷巡視問錢漕之所從出者今年張南昌極力從事於此然亦未能悉要領觀志乘之不明晰可見從來治江右者均未嘗知此事爲第一義也是故一圩著險有司以其完破無關大局而

輕置之及決後修復仍不思爲變計審定善後章程於是無年不破圩已江右變腴爲瘠賦由於此宜飭
守令認真勘圩何處坐灣何處迎溜繪圖貼說註明田糧若干圖必仿蔣圖計里界朱之式使遠近廣狹
一目了然官民合力修復鞏固後立定新章令小圩子隄各圩自承其大圩總隄分別平檢如何劃分協
修協守規條刊刻成帙使官民各有其責庶幾增高繼長以人勝天是先務之當爲急者各圩缺口之下
一望白沙成阜是皆六年前良田也田去糧在民安得不流亡無征有解官安得不虧空然曉諭查辦則
賣放熟田徒爲奸胥之利宜與有心民事之郡守熟籌借定承隄之章挨查密辦先得水沖沙壓田畝確
數乃發明文則官民並受實惠而正供亦不致爲詭寄所累 安吳四種

楊芳田制說曰勸農書曰欲仿井田不必盡泥古法縱橫曲直各隨地勢淺深高下各因水勢程子云必
井田而後天下可爲非聖人之達道道在倣其意行之而民不病蓋田不可復井而遂徑溝畛之遺意猶
存也古者后稷爲田一畝三畝以後隨地制宜田制不一區田之法見農政書云每畝可收六十六石學
種者或半之或云一畝可收六十石 國朝康熙丁亥桂林朱公龍耀爲蒲令取區田法試之後爲太原
司馬在平定亦然收每區四五升畝可三十石爰爲圖設刊布之近衢州詹公文煥監督大通試之于官
舍隙地一畝之收五倍常田又聊城鄧公鍾岳于雍正末亦會行此一畝多收二十斛王爾縉于大學時
力務爲此畝得五六石因著區田法然則前人畝收百石六十六石六十六石與夫三十石之說或未必然
大約地少而收倍良不誣也陸桴亭欲以代田之法參區田之意更斟酌今農治田之方而用之良思辨
錄此變通區田之法而善用之者也若夫建堤障水則有圍田築土避水似圍而小其面則有櫃田築木

作田培葑泥而泛水上則有架田亦名葑田瀕江沿海積淤泥而成腴壤則有沙田更有塗田梯山爲田
又有梯田種植蔬果別有圍田因地異制詳見農桑訣及勸農書康濟錄行世較區田爲廣矣圍田者四
圍築長堤而護之內外不相通江以南地卑多水田皆築土爲岸環而不斷隨地形勢四面各築大岸以
障水中間又有小岸或外水高而內水不得出則卑而洩之以是常稔不荒今北方地坦平無岸澗不能
禦水旱不能蓄水焉能不荒須令有力之家度視地形各爲長堤大岸以成大圍岸下須有溝洩水則外
水可護而內悉爲腴地何慮水旱也櫃田者其法築土護田俱留澗穴順置田段便于耕蒔若遇水荒田
制差小壘築高峻外水難入內水則車之易涸淺沒處宜種黃稭稻此稻自種至收不過六十日能避水
溢之患如水過澤草自生糝稗可收高涸處亦宜陸種諸物此救水荒之上法因壩水澗田亦曰壩田沙
田者沙淤之田也今通州等處皆有之此田迎水地常潤澤四圍宜種蘆葦內則普爲塍岸可種稻秫稍
高者可種棉花桑麻旱則便溉或旁繞大港澗則洩水所以無水旱之虞但沙漲無時未可以爲常也塗
田者瀕海之地潮水往來淤泥常積上有鹹草叢生此須挑溝築岸或樹立樁橛以抵潮汛其田形中間
高兩邊下不及數十丈卽爲一小溝數百丈卽爲一中溝數千丈卽爲一大溝以注雨澗謂之甜水溝初
種水稗斥鹵既盡可種梁稻此因潮漲而成與沙田無異者也架田之法架猶筏也農書云若深水數澤
則有葑田以木縛爲田坵浮繫水面以葑泥附木架上而種藪之其木架田坵隨水上下浮泛自不淹沒
自初種以至收穫不過六七十日水鄉無地者宜效之以上皆近水而爲之制者也惟梯田則成于山多
地少之處除峭壁不可種其餘有土之山裁作重磴皆可執種如土石相半則須壘石相次包土成田若

山勢峻極人須僣僂蟻沿而上耨土而種自下登陟俱若梯磴故名梯田如有水源則可種旱稻杭稻如止陸種亦宜粟麥蓋田盡而地盡而山山鄉細民求食若此之艱也自園田以至梯田俱可植穀至種蔬果之田謂之圃田其田繞以垣墻或限以籬塹實郭之間但得十畝足贖數口若稍遠城市可倍添田數至一頃而止結廬於上外周以桑課之蠶利內皆種蔬惟務取糞壤以爲膏腴臨水爲上否則量地掘井以備灌溉地若稍廣可兼種麻苧果物比之常田其利數倍此園夫之業可以代耕養素之士亦可託爲隱所乃農事之支流而田功之餘事也大抵田制不一各因地以制宜而力田之事全恃農夫有真精神流貫於其間凡選種之取其肥實糞力之取其腴厚耕耨之必利其器播植之必乘乎時至織至悉且有緇綸臨民者誠能訪窮簷之疾皆知稼穡之艱難寓撫字於催科殷鞠謀于積貯烏在老農老圃之事非卽大人之學哉 蕭庵集

胡林翼論貴州境插花情形啟竊以貴州境地多插花安順尤甚林翼哀不自揣思欲逐一察清妥擬章程彼此移易歸於至當謹先陳愚管仰祈訓示如蒙允準再行縷析繪圖陳說呈懇咨部改撥以正經界以便官民查貴州所謂插花地者其情形約略有三種如府州廳縣治所在此而所轄壤土仍隔越他界或百里而遙或數百里之外世謂之插花卽古所謂華離之地也又如二壤本屬一邑中間爲他境參錯僅有一綫相連世亦謂之插花卽古所謂犬牙之地也又如一綫之地插入他境既斷而復續已續而又絕縣縣延延至百十里之遙世亦謂之插花卽古所謂甌脫之地也而貴州所以多插花者其故又有三貴州之郡縣一因乎明之衛所一因於元明之土司一因於剿撫蠻苗所得之土田明之衛所本以屯

田爲寶壤而屯田亦有星散四出之地 國初諸公徒取其城治相近者卽并爲一邑未暇一一清釐所以州縣地多插花其弊一也土司之壤或承自唐宋或撥於元明歷世既久彼此侵奪本非畫一之規及其獻土也則舉其所有而歸之於州縣不暇一一爲之分析所以州縣又多插花其弊二也征討之法或用雕剿則平一姓而兼平數姓之人招降之利必聯族類則降一寨而兼降數寨之人當其創制州縣輒以一時所獲田土歸之一邑所以插花愈多其弊三也三者之弊皆因戡定亂略之時未暇深考而其流弊乃百出而不窮姑卽弊之切近者言之插花地有離本治二三百里而離他治未百里數十里者民之輸將也不於其近而於其遠期會不時資斧既竭遠來負米勞費可矜此其不便於民也府廳州縣號爲親民之官欲其出入可見咨詢易及耳乃所親者在遠而所不親者在近縱有留心民瘼之良吏亦限於聞見而莫可如何追呼不便公事掣肘此其不便於官也凡此各弊相沿已久而不敢輕言更張者則恐吏胥之因緣爲奸更恐州縣之肥瘠不定耳然使官不擾民自爲經理就疆域之形便而截長補短卽錢糧之會計而益寡裒多不更易州縣之名不增減糧賦之數則民情當必帖然而吏治實爲大便姑卽安順而論之安順領二州三縣而知府及同知通判皆有分地是名爲五屬實八屬也八屬之中插花無慮數十處其最多者又莫如安平鎮甯安平居府城之東少北鎮甯居府城之西中隔府屬及善定形勢本不相連而此二州縣之壤割裂交錯幾無整段略而言之蓋二邑各離而爲三其與安平城治相近者則爲五所及柔東三排五所者明代平壩衛之故地也柔東三排者明代柔遠所東偏之故地也五所三排聯聚一處東西相距九十里南北相距八十里東北一綫接清鎮之蘆荻哨西南一綫接善定之石板房

爲驛道近旁之地而環其南北者皆鎮甯插花地此安平之正壤一也柔西三排在安平之西北七十里北賁思臘河之南數里有齊伯房城卽明柔遠所之故城也三排所亦卽明代柔遠西偏之故地也其地東西相距二十五里南北相距三十里東南西三面多爲鎮甯插花地所環北又賁筑羊鵝塘茅草寨及大河十三寨環之自柔西至安平必出鎮甯插花之境此安平隔越在西北之壤二也又有西堡十二枝者本西堡土司之故地原屬普定康熙五十五年始改屬安平其地在安平西北二百里東西相距七十里南北相距六十里跨沙家大河之南北二枝在河北十枝在河南沙家大河者卽思臘河之上流也是河自郎岱之黃沙渡流入西堡之六罵枝爲陰鷲渡員十二枝之北境行三十里至樂東渡出西堡境又隔二百里至邱哨渡始入柔西之境復爲安平地其間蓋爲郎岱普定鎮甯平連之地所隔越也若自西堡入安平必假道普定之定南里及鎮甯之蒙楚諸枝此安平西北絕越之插花三也至若鎮甯州之三壤則附州城諸枝一也安平以北諸枝二也安平以南諸枝三也鎮甯附州城之地爲東屯枝爲西屯枝爲郎洞枝東西相距約五六十里南北亦然此爲鎮甯之正壤又有木岡漿水阿破三枝在其北東接普定之定南里西接郎岱之羅別汎雖爲普定之腰鋪水母塘所隔而阿破枝之北古寨越在沙家大河之北毘連平接以其大致尙與鎮甯治所相接續卽可謂爲鎮甯之正壤此其一齊伯房枝居安平柔西之東而公具蒙楚二枝又居其西其南三枝大勢環接然在普定定南里之東不與州北之三枝相連又橫梗安平柔西之中爲鎮甯隔越在東之地此其二上九枝中九枝下九枝居廣順州之東安平之南而南聯歸化廳西則本州之隴草枝東則本州之華楚枝諸枝大勢相聯團聚一處爲鎮甯隔越在東南之

極境此其三大抵一邑之六壤或數寨旁出或半枝隔絕非親履周詢不能縷析也其他若府屬之與普定則府屬之五起十三枝與普定之五里五枝往往交錯大約縣境居北及西南而府境在東及南縣境自城而北直屬於三岔河則本明定南里之故地又自城而西南直接乎歸化則五枝之地本甯谷司所改也其四里居驛道之旁者則普定衛之故地也大勢尙相連接然又有東出二百餘里遠在鎮甯華楚枝之旁而介乎貴筑廣順之間者則爲尅坐場府屬之五起本爲安順舊州之地其餘十三枝則安順舊軍民府之地也十三枝參錯勻布自東而南而西薄乎縣屬之甯谷五枝而止然又有水西莊在鎮甯之西南三十里蜡達寨錯出安平堡唐基堡之東錢唐堡錯出安平猪槽堡之東亦府屬之插花地也郎岱歸化二廳地頗連屬蓋書疆在雍乾之際其時司事者留心疆域故無遺議清鎮雖併聚在東北一隅而貴筑之穀上穀下二里袤六七里廣且百餘里又有羊鵲塘舊人寨茅草寨若絕若續與之橫互其中居二穀之北者爲鎮里安里明故鎮西衛之地居二穀之南者爲清里定里明故威清衛之地永甯雖集處於西南之一隅而其地本偏遠州城及打罕一馬沙營頂營募役三司六保阿果二枝皆居北盤江之東樂運樂場樂舉八大朵蕙播西豈便豈由八十石石灣寨下募役十一馬寨又在白水河之東惟江外金井之地則居北盤江之西外界貞豐地復荒廣爲盜賊聚萃之區凡此皆諸屬插花之情形也又攷西堡去安平遠而去鎮甯近齊伯房公具蒙楚上九中九下九隴革華楚八枝去安平近而去鎮甯遠若舉以相易實爲兩便他若穀上穀下之當歸清鎮江外之宜併貞豐則又事關外郡不敢輕議也胡文忠集

咸豐九年浙江巡撫胡興仁奏遵查餘姚縣鄉民求減田租業佃不和土匪乘機滋事各情諭曰將來全行

弋獲務須持平辦理固不可曲貸鄉民以長刁風尤不准取悅紳富致抑良民徹底根究不可苟且了事

馮桂芬與水利議曰國家休養生息二百餘年生齒數倍乾嘉時而生穀之土不加闢於是乎有受其饑之人弱者溝壑強者林莽矣小焉探囊胠篋大焉斬木揭竿矣客或語余曰英吉利縱橫數百里國耳惟能涉重洋不遠萬里墾田拓土故生息愈繁國用愈足中華無是故貧其言達矣雖然近將墾之實論乎遠夫一畝之稻可以活一人十畝之梁若麥亦僅可活一人直省田凡七百四十餘萬頃會典乾隆四十二年數 通真田制馬平水土九州之地定墾者九百一十萬八千二百頃為數轉多惟九州疆域及步法畝法無確據未可遽加比較至漢以下歷代墾田數多少懸殊杜氏謂史失實者近之 種稻之田半焉其餘豈盡不宜稻哉聯方氏宜稻之州七今僅存荆揚亦後世百度廢弛之確證也西北地脈深厚勝於東南塗泥之土而所種止梁麥所用止高壤其低平宜稻之地雨至水匯一片汪洋不宜梁麥夫宜稻而種梁麥已折十人之食為一人之食況不能種梁麥乎然則地之棄也多矣吾民之天闕也亦多矣顯

惠堂集

同治五年諭會國藩奏查辦湖團分別留遣並酌籌善後事宜一摺據稱江蘇銅浦兩縣濱湖田畝前於咸豐元年間因黃河鹽工決口時被水淹沒嗣因黃水退涸變為荒田經前任南河河道總督庚長設立湖田局招墾繳價輪租充餉山東曹濟等屬各縣客民遂陸續前赴該處勸立湖團相率墾種屯聚日多銅浦土民於水退歸鄉後因舊時田產被客民所墾日相控鬪釀巨案並有刁劣生監設局斂錢屠以湖團通捻謀逆等詞匪控希圖將客民概行驅逐見經訊明分別良莠辦理並擬設立同知及籌辦善後章程三條等語所辦甚屬

允協銅浦等縣土民田產因被客民占墾控關不休固出於情之不得已惟當地方官立局招墾時該處土民並不呈請認還舊產迨客民出賃認墾變荒爲熟始行爭控亦無以服客民之心且所墾之田亦有官荒地畝土民被占田產並無如許之多其聚衆搆訟者亦非田產被占之戶見經會國藩查明將上年容留搶匪之刁王兩團客民驅回山東本籍所有該兩團退出田畝六百五十餘頃抵還侵占之數計已有贏無絀凡有印契糧票之失業土著各戶均准其報官認種以昭平允其餘安分各良團均不得概行驅逐所墾地畝均准其永爲世業該處土民不得再行爭控經此次清理之後該地方官遇有土客爭控之案但當分別良莠不得復存土客之見以期永斷葛藤其沛縣激衆搆訟之生員王燦華著卽革去衣衿以示懲儆嗣後再有土著刁劣紳民聚衆誣控希圖斂錢肥己及客民中有恃衆逞強滋事者均著該地方官從嚴懲辦通匪在逃之客民王長振著會國藩嚴拏務獲正法所請將徐州同知移紮該地方以資彈壓之處著該部議奏尋吏部議既據奏稱徐州境內必須駐有廳員彈壓應如所奏辦理將徐州同知移紮該處以制要害從之東華續錄

光緒十年兵部尙書彭玉麟條奏粵東環海爲疆三江匯注西江容納百派尤源遠流長皆以廣州爲歸墟之所從前海口深通江面寬闊建領順軌尙鮮泛濫嗣以下流香山新會東莞新安順德番禺各屬每於沿海淺水堵石築壩攔阻泥沙淤成田畝於是羣起爭利東以斥鹵報西以草垣升圍外加壩田外生田河面日感出水日艱大雨時行各江盛漲上流各屬動遭水患決圍潰隄間歲相望擬請援照乾隆十三年湖北巡撫彭祖葵奏禁私堦灘地嘉慶七年湖南巡撫馬慧裕奏禁增築湖田隄堰辦法曉諭各屬沙坦以現在報墾成田者定爲限制嗣後永遠禁止添築石壩基圍以利宣洩而慶豐饒彭剛直奏稿

十二年兩廣總督張之洞奏稱臣前欽奉 上諭沙田升科一事正賦攸關豈容奸民蔽匿迭經戶部奏催辦理著該督撫督飭所屬查明已升科若干畝未升科若干畝即將未經升科之沙田迅即確查妥辦等因當即恭錄欽遵督飭司局籌議辦理近准戶部咨現擬改辦升科誠屬正本清源之計粵省地居濱海沙坦較寬此項退水之田素稱膏沃獲利既重流弊滋多是在妥議章程豫定期限嚴稽匿稅慎選賢員一切事宜果能經理認真自必立有成效況仿照山西豐甯馬廠成案辦理更有把握萬不至若從前之因難中止務須妥速籌辦勿涉因循等因復經轉行飭辦茲據廣東布政使高崇基會同沙田局司道詳稱粵省沙田以廣州府屬香山為最多順德新會東莞次之番禺南海又次之潮州府屬海陽揭陽潮陽澄海等縣為數有限自嘉慶二十三年查辦升科以後所有新沙溢坦斥鹵成熟難迭經報查清丈飭令照例升科終以未經部覆核定未能入額徧徵各業戶坐擁膏腴仍完斥鹵輕則至沙田畝數溯查嘉慶二十三年奏案已查明奏准升科者五千三百餘頃此項名為額數咸豐年間屯田變價案內除由官長虛稅無人承領五百餘頃外實則升糧者一千四百餘頃至同治六七年間清丈案內查出溢田繳息升科者五百餘頃光緒七年補升案內查出斥鹵成熟應按則補升者四千餘頃此各項皆為新沙此外近來新增溢田自當不少但未經呈報勘丈無從懸擬合計老沙新沙有案可稽者共計一萬一千三百餘頃至同治年間清丈案內奏報沙坦一萬九千餘頃查與司案縣案皆不相符似係舛誤無關收息銀數出入應俟查明致誤之由另行辦理惟查老沙田則皆未請給部照民間但憑銀單縣照司照營業其間或有遺失或經典售影射侵佔啟爭受累均所不免此次擬請除原額民田外無論老沙新沙一律換給部照其每戶田不及一頃者以一戶為一

照若一戶過一頃者以一頃爲一照如數頃數十頃之外尙有尾零數十畝亦儘數填給一照以便買賣分
析老沙無庸再丈按册核給新沙清丈明確立時填給嗣後民間買賣過割以此爲憑仍詳加查勘分別上
則中則升科起征永遠免其攤派捐籌此次繳息定則俱較舊章酌量從寬庶國課漸充民情亦順現已
詳察輿情酌擬章程一面遴員設局延商公正大紳出示開辦惟必須頒發戶部空白執照隨時填給方期
鼓舞其照式由粵省酌擬咨部核定刊發詳請具奏前來臣查廣東查辦沙田之案自道光二十四年以
來已不下五六次或溢坦歸屯或屯田變價或斥鹵補升或呈報溢坦或海防沙捐查勘累年籌捐多次惟
始終未領部照未編賦額以故清如不清丈如不丈不能取信於民由來已久此次遵旨清丈升科應頒
部照隨丈隨給使各沙戶曉然於此舉實爲便民安業一勞永逸之計執有此紙以後或買賣或管業永息
訟爭更無派累庶可踴躍趨公一律澄清查臣前在山西巡撫任內勘辦豐甯官荒馬廠卽係奏准頒發空
白部照隨丈隨給一時租戶耕氓無不爭先引勘惟恐清丈委員到來之晚事理相同民情可見竊聞直隸
奉天等處丈勘荒地辦法略同此次部咨既准仿照山西豐甯馬廠成案催令速辦相應援案奏請卽委員
赴部領辦此項部照回粵以期妥速合無仰懇天恩敕部迅速頒發空白沙田執照數萬張交委員領回
俾得及早勘辦一俟辦有成數隨時咨報實於清賦便民大有裨益張宮保政書

又片奏再廣東遵旨查辦沙田升科前經臣奏請勅部頒發空白執照一萬張並將設局清查升科分
別繳款換照章程奏明在案查廣州府屬沙田舊章其老沙已補升者均照番禺上則徵銀米其新沙未經
成熟者均屬斥鹵輕則每畝約完銀四釐有奇不徵米凡老沙新沙各坦向俱祇發司照或由縣發給墾單

便執爲管業之據今設局清查無論已升未升上則中則斥則自應一律換給部照俾資遵守惟此次戶部所發執照祇有上則中則兩起並無斥則之照各局委員每多拘泥遇有未熟坦畝遂謂無照可發議請停給臣查光緒十二年七月內請頒部照原奏聲明無論老沙新沙一律換給部照老沙無庸再丈按冊核給新沙清丈明確立時填給嗣後民間買賣過割以此爲憑仍分別上則中則升科起徵等語並無何項沙坦無庸發給部照之說且前次奏定章程聲明草白等坦酌減花息勘明後分別給照定則升科起徵是草白坦亦應給照尤爲明甚但未成熟未便遽發上則中則之照不可謂斥則以下遂不發給部照也况草白坦等項望影佔築尤易起爭豈可轉令私照管業留貽訟累且今日之新坦卽將來之熟田一經給照則土名畝數業戶姓名承墾年月一一明晰俟五年升科之期戶不須另查田不須另丈業戶雖欲延匿而州縣有冊可憑祇須勘明成熟分別升科則按戶加升豈不簡易扼要一勞永逸且本屆清丈勞費數年若於此次大舉清丈之後業戶仍無確實可信之部照執以爲憑必致成熟屆期重丈有擾換照有費胥吏得賄永不報升覬覦不息訟端不已萬籛懸宕撤局無期是徒爲胥吏開需索之門爲民間留無數未完之案營經嚴飭司局一律發給部照以示民信清田額勒限今年年底將所領執照一萬張一律發竣如有不敷再行奏請續發惟現領部照既無斥則等項名目若待另行請領未免往返需時除熟坦分別上則中則填照發給外應將未熟之草坦白坦水坦照章列入斥則一律發給部照於照內分晰註明令地名畝段花戶墾期一有案可稽俟五年成熟補升之期按冊查勘未熟者仍其舊實已熟者改註補升科則則賦既不匿民亦不擾實於清賦恤民均屬大有裨益再查新安縣向未報有沙田此次查出該縣沙田皆係鹹水沙坦遠遜